

春秋质疑

杨于庭

文硕阁

wenshuoge.com

目录

关于我们	3
提要	5
原序	6
凡例	8
卷一	9
卷二	13
卷三	16
卷四	19
卷五	20
卷六	25
卷七	28
卷八	30
卷九	33
卷十	38
卷十一	43
卷十二	46

版权声明

本书版权保护已经过期，属于公版书！并由"文硕阁"网站的用户制作并发布于文硕阁 网站内,请大家在“合理使用”范围内使用

这本电子书可供中华人民共和国（the People's Republic of China）和世界上大多数其他地区的任何人免费使用，几乎没有任何限制。您可以根据本文件中包含的"传硕公版书许可条款"中的授权许可进行复制、赠送或改编它。

如果您不在中华人民共和国，您必须在使用本电子书之前查看您所在国家/地区的法律。

什么是公版书？

根据我国现行「著作权法」第 20、21 条的规定，除署名权、修改权、保护作品完整权外，中国公民对其著作的法定权利均于作者死亡后第五十年的 12 月 31 日截止。超过著作权法保护日期后，其作品就进入了公有领域（公共版权）

这种因作者死亡超过 50 年而丧失发行权、改编权等著作权利的书籍，就称为“公共版权书籍”，简称“公版书”。

传硕公版书保护计划

中华文明5000多年绵延不断、经久不衰，在长期演进过程中，形成了中国人看待世界、看待社会、看待人生的独特价值体系、文化内涵和精神品质，这是我们区别于其他国家和民族的根本特征，也铸就了中华民族博采众长的文化自信。

文化是一个国家、一个民族的灵魂。文化兴国运兴，文化强民族强。

所以我们发起了公版书保护计划。来帮助把中国五千年的文明硕果进行电子化并服务于大众，我们网站所有内容都是免费、自由、无版权的。对所有的读者免费！

使用 **文硕阁** 中的公版书 不需要获得许可（在中国，这属于“合理使用”）。这适用于所有用途，包括商业用途。换句话说，即使是商业盈利用途，也无需支付版税。

我们希望能有更多的用户加入到文硕阁网站中来，让我们一起来保护传承文明的硕果。

源浚者流长，根深者叶茂。文化自信是一个国家、一个民族发展中最基本、最深沉、最持久的力量。

如何联系我们？

网站：www.wenshuoge.com

邮箱：7sbook@duck.com



(扫码访问网站)



(扫码加客服微信)

提要

钦定四库全书 经部五

春秋质疑 春秋类

提要

【臣】等谨案春秋质疑十二卷明杨于庭撰于庭字道行全椒人万历庚辰进士此书之旨以胡安国春秋传意主纳牖褒讳抑损不无附会於春秋大义合者十七不合者十三又於左氏公谷或采或驳亦不能悉当因为条摘论列之如胡氏谓春王正月乃以夏时冠周月于庭则引礼记孟献子曰正月日至可以有事於上帝七月日至可以有事於其祖证日至之为冬至即知周以子月为正月又胡氏谓经不书公即位为未请命於王于庭则引文公元年春王正月公即位越四月天王使毛伯来锡公命成公八年秋七月天子使召伯来锡公命据此则锡命皆在即位之後数年或数月可知前此之未尝请命而皆书即位胡说未可通又胡氏以从祀先公为昭公至是始得从祀於太庙于庭则谓季氏靳昭公不得从祀其事不见於三传至冯山始创言之胡氏不免於轻信凡此之类议论多精确可取固非妄攻先儒肆为异说者比也乾隆四十三年七月恭校止

总纂官【臣】纪昀【臣】陆锡熊【臣】孙士毅

总校官【臣】陆费墀

原序

春秋质疑原序

自公羊氏谷梁氏出而左氏绌自胡氏列之学官而公谷亦绌然其微事不于盲史乎其参订不于二氏乎而若之何华衮也斧钺也一切尸祝胡氏而亡敢置一吻也盖孔子晚而作春秋其微者使弗知也即知之弗使告也而七十子窃闻之则退而私论之盲史掌故而高与赤亦西河之徒也耳而目之而犹以为如天地之摹绘焉而不得而况乎生于千百世之下而姑臆之乎胡氏砭砭摘三传之纇而擷其华语多创获其于笔削之义迹矣然其议论务异而其责人近苛间有剿公谷而失之者以王子虎为叔服公孙会自?出奔之类是也亦有自为之说而失之者卒诸侯别于内而以为不与其为诸侯滕自降称而以为朝桓得贬之类是也庭少而受读尝窃疑之归田之暇益得牖列而虚心榘焉榘之而合者什七不合者什三则笔而识之而质疑所繇编矣博士家谓三传出而春秋散而胡氏执牛耳也吕不韦悬书于市而诏之曰更一字者予千金此必不得之数也夫既列胡氏于学官而噤左公谷之口是悬之市也既悬之市而余犹置一吻于其间是吾家子云老不晓事而恨不手不韦之金以归也盖汉人之祀天也以牛夷人之祀天也以马而天固苍苍也祀以牛以马不若以精意合也夫不以精意求圣人而执胡氏诮左公谷是祀天而或以牛或以马也兹余所繇疑也万历己亥春王正月谷旦杨于庭序

宋王荆公疑春秋经筵不以讲学官不以列万世非之荆公疑其所以治春秋者耳春秋孔子之刑书笔则笔削则削虽其门人弟子文学如游夏不使赞一辞平居之雅言不及焉必其鈇钺华衮之微旨有未易以语人者而安在其後世诸儒尽管窥之而蠡测之也汉元康甘露之间召名儒大议殿中平公谷异同宗公羊者诮谷梁尊谷梁者亦诮公羊贾长沙独训故左氏传中垒校尉歆笃好之白左氏春秋可立至移书太常责让其屈三者通兴废然左氏不得与公谷并重矣荆公之时胡氏书未出彼其睹汉以前儒为公谷氏之学者或用以绳下或传为峻文虽以董江都之贤治公羊与胡母生同业不免于菑异事应之说而张禹之善左氏其流为陈钦子佚以授王莽陰移汉祚其心窃非之是以敢罢去之而不顾疑其治春秋者而并以废孔氏之春秋此荆公之大失也盖至胡氏之学兴而三传弗废矣非胡氏之能废三传也左氏详於事而略於义後世读之者第好其文而已公与谷则不幸而出於汉世也吾以为左丘明生鲁春秋之时与夫子同耻又身掌国史典故其所着书即於义例未甚明于事故详其譔述当不至大谬公谷及夫子之门人沿流得之子夏盖亦有传授者义例之兴于左氏烈矣至其二家之互相抵牾则荣广眭孟之徒为之也胡康侯当宋南渡之世折衷春秋传以进其意主於纳牖褒讳抑损不无附会焉核非不精而精或以凿裁非不严而严或以拘其炳大义者固多其不尽符者亦有之孟子曰春秋天子之事也又曰诗亡然後春秋作事则齐桓晋文文则史义则窃取之矣摘事於文左氏是已公谷义之所由兴也但孟氏称天子之事诸儒称孔子匹夫之事孟氏不言假南面之权诸儒言孔子假之夏时冠月之类不啻多矣故其书之所可疑者衆也孔门惟子夏可与言诗诗序子夏之所作也宋儒黜以为非子夏之所作也三百篇之诗无淫者诗序废而诗有淫矣何者序亦不幸而出於汉世也则又何论公谷乎鲁鱼亥豕其讹相似其误不远郢书燕烛解之愈精失之愈甚矣杨先生於六籍靡所不窥读春秋间

不满胡氏说辄置疑焉彙而成帙以质四方杨先生者春秋之孝子公谷之慈孙而胡康侯氏之忠臣也余故弁而论之以为麟经鼓吹云万历庚子五月谷旦邱应和序

凡例

春秋质疑

凡例

一今代表章胡氏余读之而当于心者不述述余疑者一凡左公谷之说胡氏采之而当于余与夫驳之而当于余两不述余述夫采之驳之而疑者

一义不系褒贬而其事可以证古今触议论者述一四传语殊虽义不系褒贬而其纰而可摘者述

卷一

钦定四库全书

春秋质疑卷一

明 杨于庭 撰

隐公

春王正月上

胡氏曰周以建子为岁首则冬十有一月是也建子非春乃以夏时冠周月者此所谓行夏之时而见诸行事之验也余曰非也藉令建子建丑而遂以子丑之月为春则胡氏之说非也若但以子丑之月为岁首而仍以寅为春则胡氏之说亦非也何言乎以子丑之月为春而胡氏之说非也史伯璿曰行夏之时者兼春夏秋冬而言之者也既有所谓夏之时则必有所谓商之时周之时矣夏之时以建寅之月为春则周之时必以建子之月为春矣若周之时春亦建寅无异于夏则又何必曰行夏之时哉余按果如此说则是周人建子即以子为春而所谓春王正月者乃孔子从周而不变而杜预所谓所用之历即周正者此也安在其行夏之时而见诸行事之验乎故曰建子建丑而遂以子丑之月为春则胡氏之说非也何言乎以寅为春而胡氏之说亦非也伊训惟元祀十有二月蔡沈曰商建丑故以十二月为正三代虽正朔不同然至于纪月之数皆以寅为首非独蔡沈有是论也胡氏亦曰前乎周者以丑为正其书始即位曰惟元祀十有二月则知月不易也后乎周者以亥为正其书始建国曰元年冬十月则知时不易也建子非春明矣愚按果如此言是周人虽以子为岁首而至于春夏秋冬则未尝不以寅为序初非以冬为春春为夏夏为秋秋为冬也至仲尼作春秋乃冠夏时于周月之上而以冬为春是本欲行夏之时而反紊乱天地四时之序大不若建子建丑而仍以寅为春者之为妥矣故曰以寅为春而胡氏之说亦非也然余尝考左传僖公五年春王正月辛亥朔日南至注曰冬至也隐九年三月癸酉大雨震电桓十有四年春正月成元年二月无冰桓八年冬十月雨雪定元年冬十月陨霜杀菽皆以为灾而特书之则信乎以十一月为正月矣总之以冬为春者乃鲁史从周而圣人因之而不变更正所谓今用之吾从周者也至于告顔子以行夏之时则又斟酌百王所谓某有志焉而未之逮者与此正不相妨也以为冠夏时于周月之上则凿矣

春王正月中

或问于余曰夏时冠周正此非独胡氏之言而程子之言也程子曰周正月非春也假天时以立义耳余应之曰理有不可从者尚书序汉儒以为孔子所作今犹议之况程子乎夫春王正月此夏正之十一月也以十一月为正月而遂以为春此周正也鲁人世遵之者也非本无此事而孔子创为之者也何以明其然也礼记明堂位曰季夏六月以禘礼祀周公于太庙杂记

孟献子曰正月日至可以有事于上帝七月日至可以有事于其祖夫日至者冬至也七月日至者夏至也鲁本以季夏六月禘至孟献子改为七月故又曰七月而禘献子为之也则是鲁人明以建巳之月为季夏矣既以建巳之月为季夏则建子非春而何故曰以冬为春此周正也鲁人世遵之非孔子创为之者也十一月可以为春乎曰何不可也春之为言蠢也万物蠢蠢然动也一阳初生管灰吹动即以为春何不可也总之天开于子地辟于丑人生于寅以故三代迭用之然非自三代始也甘誓曰怠弃三正则自唐虞以前固有建子建丑者矣特以历起于子丑终不如建寅者为尽善故孔子独取夏时焉而非谓建子丑为不可也惟秦以建亥为岁首则不过区区厌胜之术而其去三正之义远矣或曰与其托之空言不若见之行事则以夏时冠周正不亦可乎余应之曰行夏之时此平日论为邦则然非谓纂修国史可遽改也信如胡氏之说使圣人修舆服志改周辂为殷辂乎修礼乐书改武舞为韶舞乎春秋一书本为乱臣贼子而作所纪之王周王也所列之诸侯周诸侯也所用之正朔周正朔也若以夏时冠于周月之上是先并时王冬春之序而黜之而已之无王亦已甚矣又何以讨乱臣贼子乎

春王正月下

春秋尊王乎曰然曰隐公元年平王之四十九年也书法宜曰王四十九年春正月而今年用鲁月用周者何也以是推之是年齐僖公禄父必自称九年晋鄂侯郟必自称二年曲沃庄伯鲜必自称十有一年卫桓公完必自称十有三年蔡宣公考父必自称二十有八年郑庄公寤生必自称二十有二年曹桓公终生必自称三十有五年陈桓公鲍必自称二十有三年武公必自称二十有九年宋穆公和必自称七年秦文公必自称四十有四年楚武王熊通必自称十有九年传曰先王建万国以亲诸侯又曰周之初封千八百国夫千八百国必千八百元年也纷纷不同尚谓大一统欤余应之曰古者诸侯国必有史史必以其君即位之岁纪元元年春正月者鲁史也元年春王正月系之王者圣人之特笔也晋之乘楚之檮杌鲁之春秋皆史也则皆以其国君纪元者也至如称于天子曰朝曰聘称于友邦曰聘曰朝曰会曰遇曰纳币曰胥命未有不用天子之正朔而纷纷自纪其元者何以明其然也臯鼫之将长蔡于卫也祝佗举践土之旧以争之曰其载书云王若曰晋重鲁申卫武蔡甲午郑捷齐潘宋王臣莒期夫观异姓必列于同姓之后则其举周正以号令诸侯也审矣唯吴楚僭王则其盟会必有自纪其年而不用天子之正朔者此春秋所以亟斥之也欤

不书即位

谷梁之言是也按惠公元妃孟子卒继室以声子生隐公宋武公生仲子仲子生而有文在其手曰为鲁夫人故仲子归于我生桓公礼诸侯不再娶仲子于惠公不过妾耳有文在手安知非附会乎而又安得遂以为夫人乎隐桓均之乎庶而隐公兄也桓公弟也立庶以长桓公安得立隐公又安得成先君之志而欲与桓哉礼人子从治命不从乱命先君之欲与桓乱命也从乱命而遂以与桓此刘恺丁鸿区区之行圣人所不与也故不书即位胡氏谓上不禀命于天子故不书然春秋之书公即位者多矣岂曾禀命天子哉

天王使宰咺来归惠公仲子之赙 天王崩武氏子来求赙

褒救卫则王人子突以下士而书字贬归赠则宰咺以冢宰而书名春秋之予夺严矣然以天王之加礼于鲁如此而比其崩也不奔其丧不会其葬惘然若行道之人焉于是武氏子求赙而鲁若罔闻知也是尚有人心乎谷梁曰周虽不求鲁不可以不归鲁虽不归周不可求曰来求赙交讥之也得其旨矣

宋公和卒

胡氏曰诸侯曰薨大夫曰卒五等邦君而书卒者周室东迁诸侯专享其国而上不请命故圣人因其告丧特书曰卒不与其为诸侯也苛乎是弃灰于道者有刑耳孟子曰子以为有王者作将比今之诸侯而诛之乎抑教之不改而后诛之乎夫二百四十九年之间岂无一人请命于天子者而何以槩书卒也然则何居曰春秋鲁史也内卒曰薨外诸侯卒曰卒

葬宋穆公

胡氏曰宋殇齐昭书弑不书葬讨其贼也晋景公葬止公故不书讳其辱也吴楚之君不书葬避其号也余曰是也胡氏又曰鲁宋盟会未尝不同而三世不书葬治其罪也余曰非也桓公未葬而襄公会诸侯入春秋亦有陈子会温之例何至并其父葬而削之乎襄公成公并无大罪所云治其罪者何罪也然则三世不葬者何也桓公成公鲁或不会或史失之襄公死于泓为中国讳也

葬卫桓公

胡氏曰卫本侯爵何以称公见臣子之不请于王而私自諡尔余曰非也桓公父庄公庄公父武公即所谓抑戒睿圣者以是知卫之称公久矣诸侯生从其爵卒则称公此孝子慈孙之用心圣人所因而不革何谓请命不请命乎即使请命而天王亦不能以初封之爵称之矣胡氏又曰失位而见弑何以为桓忠孝者不忍为也然尝考之春秋卫侯完并无失德直以州吁有宠于先公而阻兵安忍其见弑也亦不幸耳岂有幽厉之恶而可以恶諡加之乎

齐侯使其弟年来聘

齐侯使弟年来聘郑伯使弟语来盟此亦据其事而书之非贬之也以为讥其有宠爱之私者凿也

附錄

有文在手为鲁夫人左氏之诬也桓幼而贵隐长而卑公羊之舛也然则隐何以不书即位曰吾从谷梁邾仪父附庸也例称字左氏以为贵之公羊以为与公盟而褒之谷梁以为男子之美称失其旨矣郑伯克段于鄢左氏曰段不弟故不言弟如二君故曰克称郑伯讥失教也噫备矣郑伯曰寡人有弟不能和协而使餬其口于四方公谷皆以为杀何据宰咺归赠仲子卒

矣左氏以为未薨豫凶事非也谷梁以为惠公之母孝公之妾非之非也

入极造其国都也非灭也公谷以为灭同姓非也无骇卒未赐族也以为恶灭极而削其族尤非也尹氏卒左氏作君氏声子也然哀公之母定姒书卒书葬声子何以不书葬以是知其非声子也天王崩公羊以为天子记崩不记葬故不书则桓襄匡简景之志崩又志葬何也

郑伯不王天下之恶一也而左氏曰周郑交恶是夷周于诸侯也甚矣其懵于冠履之分也

宋穆公舍其子而立与夷左氏曰宋宣公可谓知人矣立穆公其子飧之命以义夫君子曰否公羊氏曰君子大居正宋之祸宣公为之也

卫人立晋恶其无王命父命而擅置其君也然当是时王命固絶望矣苟有父命则犹可也故于齐陈乞弑荼发之荼固有父景公之命也然乱伦干讨则虽以父命不能抗王命故又于卫侯朔发之朔虽有父宣公之命而四国纳之则贬王人救卫则褒以王命不与其为诸侯也然王命虽重苟非制命以义亦将壅而不行故又于首止之盟发之以见天子之私爱可夺而大义不可摇此所谓大居正也

考仲子之宫曰仲子不与其为夫人也不与其为夫人则桓公之自以为当立与隐公之欲让桓皆非也取郕取防左氏以为郑庄公于是乎可谓正矣以王命讨不庭不贪其土以劳王爵正之体也噫不能三年之丧而总小功之祭恶乎正入许而不取使大夫百里奉许叔居东偏左氏以为郑庄公于是乎有礼许无刑而伐之服而舍之度德而处之量力而行之可谓知礼矣噫放饭流歠而问无齿决恶乎知礼

春秋质疑卷一

卷二

钦定四库全书

春秋质疑卷二

明 杨于庭 撰

桓公

滕子来朝

滕侯爵也降而称子胡氏以为朝弑君之贼而黜之非也自桓二年以至于定哀之世滕或卒或会或盟或来朝或会葬止称子春秋之法恶恶止其身若以为朝桓得贬何故并其二百余年之子孙而尽削之乎则圣人亦太苛矣然则书滕子者何也曰滕本小国自入桓以来其君不能用侯礼自比子男故圣人因而称子亦如伯用夷礼称子也若其朝弑君之贼则直书来朝而恶自见矣

公子翬如齐逆女

隐公世翬再帅师不曰公子此曰公子翬者何也翬为桓弑隐故春秋以此为桓公之公子翬耳

州公如曹 寔来

一州公寔也以公礼如曹则书州公失国而不返则书寔以此见有天下国家者不可一日而不以礼自强而古之帝王所以兢兢业业一日二日万几者以此孟子斥纣为独夫说者曰一日之间天命未绝则为天子一日之间天命已绝则为独夫繇州公寔之事观之可见矣故桓十一年郑忽出奔卫庄二十四年曹羈出奔陈夫忽羈皆君之世子君卒而国固其国也不能自立至于出奔而春秋直斥曰忽曰羈岂不与寔来之义触类哉

子同生

国君生子恒事耳春秋十二公独桓公书子同生何也谨之也于是文姜淫周公之血胤不可不谨也

谷伯绥邓侯吾离来朝

诸侯不生名来朝而名左氏以为贱之者是也何贱乎陋而杂夷不能行朝礼焉耳胡氏以为

朝弑君之贼故贬而书名然僖二十九年经两书介葛卢来岂亦以其朝弑君之贼而名之乎又况同一朝桓也滕侯则贬而称子至并其二百余年之胤而不贯谷伯邓侯斥而书名比于失地灭同姓者然其视滕侯之罚则少轻矣邾人牟人葛人小国称人此常事也春秋圣人之刑书信如胡氏之说何其酷罚于滕继罚于谷邓而独恕于邾牟葛乎则圣人之刑亦颇矣然则朝桓无贬乎曰相率而朝弑君之贼此直书来朝而恶自见者也

亡秋冬二时

桓之春正月无王也定之春王无正月也胡氏以为圣人削之而余信以为然也桓七年之亡秋冬二时也胡氏亦以为圣人削之而余不敢以为然也然则何也曰此夏五郭公之类而孔子所谓吾犹及史之阙文也若以为弑君之贼天王及诸侯莫能讨其罪者故削秋冬二时以示法然定之十四年经有秋而无冬杜预曰史阙亦将引胡氏讨贼之说而曲解之乎且二百四十九年之间弑君之贼亦多矣而何独于桓削二时也盟于折 会于夫鍾 于阚 盟于谷丘 会于虚 于龟 及郑师伐宋

屡盟而遽伐其国无信不独宋矣没公讳之也孟子所谓行有不得者皆反求诸己此王者之事寡怨之方也

许叔入于许

许本无罪齐郑以强逐之今乘郑乱复入于许故圣人因而书之曰入于许者无贬无褒之辞且以明夫向不得入而今始得入亦以甚逐者之罪也胡氏谓宜上告天子下告方伯而後入此与揖让而救火何异焉

葬蔡桓侯

桓侯諡侯胡氏以为独请諡也按春秋二百四十九年之间止一桓侯諡如其爵其余虽曹伯薛伯?伯滕子许男之属亡不諡公者岂无一人请諡于天王乎胡氏以为周衰诸侯皆不请諡然齐自太公鲁自鲁公历十余世而入春秋亡不諡公者齐哀公以纪侯之諡为周所烹尚称曰公周天子之威既可以烹大国之君而亡忌岂容其不请諡乎陈起胡公申公世世諡公或曰陈王者之後得諡为公然春秋止书陈侯不曰陈公也郑止伯爵桓公卒于未东迁之前当时礼乐征伐尚自天子出何得不请諡而亦諡曰公乎然则死而諡公者乃公侯伯子男之通称矣桓侯之称侯何也曰传失之也晋仇何以称文侯曰晋自唐叔而後世世称侯至武公而始諡公也则命文侯而不曰公者仍其称也

葬我君桓公

弑不书葬葬我君桓公讥庄公之忘父讐也传曰讐在外者舛也

附錄

宋督弑君左氏曰君子以督为有无君之心而後动于恶故先书弑其君取郕大鼎于宋纳于太庙左氏曰君人者将昭德塞违以临照百官而置其赂器于太庙其又何诛焉国家之败由官邪也官之失德宠赂章也圣人复起不易斯言矣

谷梁以为桓不书王书王为正宋公与夷曹伯终生之卒又以为孔父父字也不名孔子为祖讳也皆曲说也

宰渠伯纠公羊以为下大夫非也

蔡人杀陈佗讨弑君也公谷以为佗淫于蔡蔡人不知其为陈君也而杀之舛矣

焚咸丘鲁地也书焚讥掩羣也公谷以为邾娄之邑非也

宋人执郑祭仲谷梁曰宋公称人贬之也胡氏曰祭仲不名命大夫也曰执责祭仲也得其旨矣公羊以为贤祭仲为知权何居且自反经合道为权之说出而世儒始有决裂名检以济其私者

突不书郑突不当有郑也忽书郑忽当有郑也当有郑而名之何失国之辞也知突不当有郑则庶孽不可萌夺嫡之心知忽以失国而书名则人君不可不自强于为善

春秋质疑卷二

卷三

钦定四库全书

春秋质疑卷三

明 杨于庭 撰

庄公

不书即位

父仇未报正人子枕戈尝胆之时而庄公且弛弛焉为之主王姬为之伐同姓为之狩于禚其忘亲事仇亦已甚矣削不书即位讥之也胡氏以为内无所承上不请命者迂也

纪季以酈入于齐 纪叔姬归于酈 纪叔姬卒

有纪季以酈入于齐而後纪叔姬可归于酈何者五庙在也微纪季则宗庙毁矣叔姬安归乎以是知季之于祖祢也孝于姑姊妹及酈人也仁于利害存亡之际也智特书字嘉之也非但亡贬而已春秋卒内女皆诸侯之夫人也叔姬非夫人特伯姬之媵妾耳而仗节守义不以国亡亏妇道故圣人笔之于经以愧天下後世之为人臣妾而有二心者纪已亡矣而书纪叔姬叔姬固纪之叔姬也朱子作纲目韩已亡而张良书韩人晋已亡而陶潜书晋徵士得春秋之遗意矣

纪侯大去其国 齐侯葬纪伯姬

纪侯大去其国悯之也善之也何悯乎纪小而逼于齐齐大而暴于是乎纪季姜归于京师盖藉庇于天子矣而天子不能庇纪侯来朝公会纪侯于成盖求援于鲁矣而鲁辞不能公会纪侯郑伯及齐侯宋公卫侯燕人战盖尝连三国之兵以抗之矣而齐不可以兵恐公会齐侯纪侯盟于黄盖尝徼惠鲁侯以好会矣而齐不可以好求则为纪侯者所谓亦莫如之何也不得已使其弟以酈入于齐以存五庙而已则委而去之并土地人民仪章器物之属而弃之如敝屣则其情诚迫而其志诚可悲矣是以圣人存其爵而不书其名以是为善之也不然失国不返一州实耳实何以名又削其爵乎胡氏以为异于太王之去豳而不知太王国于边方空濶之境虽经屡徙尚可立国春秋之世尺地一民莫不有主纪侯徙将安之执此以责纪侯则又泥矣上书纪侯大去其国而下书齐侯葬纪伯姬正所谓不没其实甚齐侯之暴于逼纪也闵公弑书公薨而下书夫人姜氏孙于齐公子庆父出奔莒圣人之书法类如此至如葬纪伯姬则所谓不能三年之丧而緦小功之察胡氏讥之备矣

齐人取子纠杀之

糾稱子胡氏以為不當殺也甚齊桓也然則魯無貶乎谷梁曰言取病內也猶曰取其子糾而殺之云爾以千乘之魯而不能存子糾以是為公病矣

同盟于幽

許男男也而叙于滑伯滕子之上可見春秋以強弱大小為班不復知有先王之爵矣聖人因而書之蓋傷之也又況滕子稱子距朝桓者已三十余年何得以一事之失而誅及其子孫乎後仿此

郭公

郭公何曰甲戌己丑陳侯鮑卒及夏五郭公見聖人之闕疑也必以郭公為郭亡而朕引齊桓公問父老之說非余所敢知也

齊人伐衛衛人及齊人戰衛人敗績

齊稱人貶之也以王命伐衛正也取賂而還非伯討矣故貶而稱人胡氏以為將卑師少者非也

公子牙卒

三傳及胡氏皆以為季友酖之也不書刺善季友也疑者曰公子牙慶父之母弟也慶父欲為亂而牙先以病卒天存魯也夫子雖為魯喜而經無異詞乃皆以為季子之酖夫季子不能誅慶父子弑君之後安能以叔牙一言之失而遽酖之乎若疑其後為叔孫則慶父縊死後亦有後況春秋弑君之賊如齊殺无知而其後有仲孫湫宋殺華督而其後有華耦華喜陳殺夏徵舒而其後有夏啗夏區夫豈皆飲酖而許立者吾姑存疑焉附錄

紀侯大去其國公羊曰不言滅為齊襄公諱也何諱乎復讐也何讐乎紀侯譖哀公烹乎周九世矣九世可以復讐乎雖百世可也余曰不然季文子欲逐公孫歸父也臧宣叔怒曰當其時弗能治也後之人何罪先王之罰罪人不孥九世而以讐報非矣

糾不系之齊不當立也谷梁以為當可納而不納齊變而後伐故惡內也非也

宋萬弑君胡氏曰太宰督亦死于閔公之難而不書身有罪也是也惠伯死于子惡之難而亦削而不書非君命也非也子惡不書弑為國諱也既諱子惡則不得不并惠伯諱之矣惠伯何讥焉

鬻拳兵諫目為愛君陋哉左氏之見也自此說一倡而後世有興晉陽之甲以除君側之惡而托之乎忠者

君举必书书而不法後嗣何观曹刿之谏如齐观社也俭德之共也侈恶之大也先君有共德而君纳之大恶无乃不可乎御孙之谏刻桓宫桷也男贄玉帛禽鸟女贄不过榛栗枣修男女同贄是无别也御孙之谏宗妇觐用币也左氏备矣

曹羈出奔陈赤归于曹与郭公上下不相蒙也公谷以为赤即郭公谬哉论也以曹杀其大夫而不名为曹羈讳则又舛矣

大夫如他国未有书所为者曰公子友如陈葬原仲讥私交也公谷以为避公子庆父公子牙之难故有所托而如陈谬也

纪叔姬一亡国妇耳归于鄆书卒书葬书纪侯失国犹书大去其国而不名也齐襄公逐人之国夷人之社稷亦云暴矣而内乱禽兽行书会书享屡见于经南山载驱诗又屡刺焉其後卒死无知之手比之纪侯纪叔姬所得孰多则信乎齐景公之富不如夷齐之贫也

一年而三筑台甚之也继书冬不雨以是为无闵民之心矣

春秋质疑卷三

卷四

钦定四库全书

春秋质疑卷四

明 杨于庭 撰

闵公

不书即位

公谷以为继弑君者是也必以为内无所承上不请命者则胡氏之迂也

齐仲孙来

仲孙不名嘉之也何嘉乎齐桓乘鲁乱有窥鲁之心而仲孙劝以务宁鲁难亲有礼圣人以是为能存鲁也故嘉之下文所谓齐高子来盟即此意也不书使嘉其存鲁也若以书来为交讥则高子来盟何以为美乎既讥之必名之矣

附錄

齐仲孙来仲孙湫也公羊以为即公子庆父何居公子顽通于宣姜诗所为刺鹑之奔奔墙有茨也夫以庶子而通其嫡母此何等事也而人可强使之者乎又岂有身为君夫人母仪一国而人可强使与子奸者乎左氏曰初惠公之即位也少齐人使昭伯烝于宣姜不可强之生齐子戴公文公宋桓夫人许穆夫人则齐东野人之语也

春秋质疑卷四

卷五

钦定四库全书

春秋质疑卷五

明 杨于庭 撰

僖公

不书即位

公谷以为继弑君者是也胡氏以为内无所承上不请命迂也

季友败莒师于郕

桎之会返席未安也而即袭败邾人之归师曲在我矣故书曰公败邾师于偃至如庆父弑君天下之恶一也莒不以为罪而受之至是而复伐我以求赂此所谓敌加于己不得已而应之者尚可以败之者为罪乎曰败莒师于郕获莒挈嘉获之也此与公败邾师于偃所谓美恶不嫌同辞胡氏以为诈谋擒其主将误矣

夫人姜氏薨于夷齐人以归 葬我小君哀姜

哀姜与弑二君胡氏以为齐人杀之可也以尸归鲁不可也既归于鲁则子无绝母之义不得不以小君葬之矣余谓哀姜之事与文姜异文姜虽与闻乎弑而诸侯未闻有讨之者庄公亲其子也父薨之後又二十有二年而後薨则虽欲不以小君之礼葬之不可得矣哀姜奔邾不还义与庙绝齐侯召而杀之于夷诸侯亡不闻者僖公虽厚于嫡母取而葬之足矣何必隆之以小君之礼而祔食于太庙乎故经书齐人以归讥齐也葬我小君哀姜讥鲁也唐张柬之讨武氏之乱先儒谓宜执武后于太庙数其罪而赐之死余尝非之以为中宗亲其子而五王又中宗之臣此庄公所不得贬文姜者也然繇斯以谈亦足以证葬我小君哀姜者之为过矣

侵蔡蔡溃遂伐楚

胡氏曰书遂伐楚讥专也谓不请命于天子也伯主之专久矣若以为讥则召陵盟楚何者而非专乎然则书遂者何也大桓公之伐楚也蔡党于楚因其嫁荡舟之姬之衅而合诸侯以侵之蔡溃而楚已披其党矣于是遂声楚罪而致伐焉所谓以小为大有名之师也故春秋大之至其不请命于天子则桓之所以止于桓而仲尼之徒之所不道也

许男新臣卒

卒许男常事尔以为不卒于师于会而亟归为不知命则臆说也

晋人执虞公

传曰不书灭不与灭也其曰晋人执之者犹衆执独夫云耳然则晋无贬乎先王之制班爵有等晋以侯而执天子之上公而天子不能讨方伯不能诘故削而称人讳之也孟之会楚以子执公则讳国韩之战秦以伯获侯则讳人隸林之役赵盾以大夫会诸侯则讳之曰师其意远矣

禘于太庙用致夫人

用致夫人如史记夜致王夫人之致盖已死者左氏曰哀姜近之削姓氏贬之也以其与闻乎弑而不宜耐食于先公也若曰成风则成风薨于文公之四年此时尚亡恙纵立以为夫人何曰用致

齐侯小白卒 葬齐桓公

入春秋而王室之衰甚矣然而桓王伐郑则三国从之四国伐卫纳朔则王人子突救之虽不得尽行其志而余威犹存也宰咺之贈凡伯南季宰糾仍叔子之聘荣叔之锡以鲁一国观之则所以羈縻天下者可知是诸侯犹藉王命以为重也则天子之于诸侯犹未截然扞格苟有能兴之者犹足与为政于天下也使齐桓毅然举太公之履以修周召共和之旧修朝覲聘问之礼为诸侯倡侵伐盟会必归命于天子然後扶控大小庶邦以问罪于天下如宋万鲁庆父之弑逆则诛之诸侯有自相侵伐者则讨之扞戎于曹攘狄于卫因以责贡于楚天下有不翕然尊周者乎顾乃强撻诸侯而盟之入春秋未有书灭者有之自桓公始一曰齐师灭谭再曰齐人灭遂以诛其首创灭国之罪而至于齐人殲于遂则直书之以志天道之好还他如伐卫而取赂侵陈而书人执轅涛涂与次匡救徐之事种种皆圣人所不与其伐楚也不敢斥其僭王而第举包茅不入之小者昭王不返尤为无谓岂非以自反不缩而然乎身死虫出至于九月而後葬其德之入人浅矣仲尼之徒无道桓文之事者以此

邾人执鄆子用之

用鄆子者伯主之虐而书邾人恶邾子之为伯主使也春秋之法罚并其党则为恶者惧矣

冬会陈人蔡人楚人郑人盟于齐

没公不书者何曰罪鲁之首于帅中国以会楚也鲁周公之後列国之望也齐桓北杏之会不得鲁则诸侯不亲楚顔薄之盟不得鲁则宋公不释鲁之为天下重久矣庄二十八年秋荆伐郑公会齐人宋人救郑齐宋师少将卑而公亲会善公之事霸谨也谨于事霸者谨于尊中国也今桓公甫没而首帅中国以盟楚使其後楚得执宋公而遂列位陈蔡之上非此会阶之乎

至公子遂如楚乞师公以楚师伐齐取谷则兴戎召祸为恶已甚虽欲讳之而不可得矣

宋公兹父卒

宋襄公卒伤于泓故也不书葬伤中国也宋先代之後爵上公继齐桓为诸侯盟主而楚以蛮夷执之于会又亲集刃于其股卒以伤死而诸侯不能救也不亦伤乎春秋有弱其君而不葬者如滕侯宿男之类而鲁宋匹敌僖公又曾盟于薄释宋公则决非愆然于襄公之葬而不使使者其为伤中国亡疑也

天王出居于郑

天王出既赴告于鲁则其入鲁未有不知之者也然而不书者何也削之也何削乎削晋文公之纳王也何削乎纳王纳王臣子之常分也而文公振振然矜之于是乎请隧而不与也则又多受田于周至于俘天子之亲姻而不顾故仲尼以为不足书也

公会诸侯盟于宋

不曰会楚子而曰会诸侯讳之也何讳乎存中国也

执曹伯 执卫侯 围郑

甚矣二伯之伎也以不礼而灭谭以不至而灭遂以一语不协而执轅涛涂伐陈侵陈者齐桓也以观骈胁而执曹伯畀宋人以不假道而执卫侯使酖之以不礼而围郑者晋文也甚矣其伎也宋艺祖有言尘埃中可识天子宰相则人皆物色之矣此王者之量王者之言也

盟翟泉

没公而人列国之卿左氏以为卿会公侯胡氏以为盟王子虎余曰兼之也盟处父荀庚孙良夫郤犇者皆没公则左氏之说何可少也

晋侯重耳卒

请隧召王盟王子虎齐桓之所不敢为也伐曹卫致楚已私许之复以怒之齐桓之所不屑为也一战胜楚遂主夏盟八年之间威加天下齐桓之所不能为也以故其効弥速道弥卑功弥高事弥谄矣虽然桓公没而国大乱晋为盟主百有余年何也齐桓内嬖如夫人者六五公子争而晋文之齐姜贤杜祁文贤以君故让偪姁而上之以狄故让季隗而已次之其家法胜也齐孝庸驾盟楚于国伐宋伐鲁失其据矣晋襄之略不减于文既退三强诸侯畏服灵成景厉代争诸侯悼公萧鱼几于王道其嗣述胜也管仲死齐无人焉晋则狐偃赵衰先轸随会郤缺栾书韩厥知罃魏绛之徒代不乏人师武臣力其谋臣胜也晋大于齐诸侯畏之兼斯三者欲

无霸得乎

附錄

齐为伯讨哀姜是也惜乎其不能讨庆父耳左氏以为已甚谷梁以为讳杀同姓非也

齐起临淄距江黄二千余里而楚不过八九百里楚悉师方城之外以伐江黄齐救未至而国已毙矣盟于贯会于阳谷说者皆善齐桓掎角以制楚然尝考管仲之言曰江黄远齐而近楚若伐而不能救则无以宗诸侯矣桓公不听其後楚人卒灭黄灭江而中国未如之何也使王者处此则必修文德以来之不至好大喜功而貽祸与国矣

许男卒刘敞引檀弓曰国君即位而为禭岁一漆之以是知死者古人之所不讳所谓生寄也死归也汉世犹有古意贾谊上文帝书曰万岁之後传之老母弱子将使不宁呜呼于今亦罕矣虽然今制上即位即营山陵亦即位而为禭意也

楚伐许许男面缚衔璧大夫衰絰士舆榑楚子问诸逢伯对曰武王克殷微子啓如是武王亲释其缚受其璧而祓之焚其榑礼而归之有诸乎曰否好事者为之也按尚书微子若曰我其发出狂吾家毫逊于荒今尔无指告予颠隲若之何其父师若曰商其沦

丧我罔为臣仆诏王子出迪我旧云刻子王子弗出我乃颠隲自靖人自献于先王我不顾行遯盖微子痛紂将亡已欲与家毫逊遯矣箕子然之以为商固将亡我等无为异国臣仆之理而其势又不能久居于位盖昔日我以王子贤而长请立之紂忌之久矣今若不去是我前日之言适害子也为王子计唯有出遯荒野以全宗祀无至颠隲我则当死职而不顾行遯也盖微子之去不过出遯在野避紂乱岂有抱祭器而奔周如太史公所云乎祭器藏在太庙微子安得抱之而奔审尔是春秋所书盗窃宝玉大弓之类何以称仁武王克殷释囚封墓之外不闻所以处微子者或以其遯野求之不获及武庚诛而卒求得之始封之于宋耳且武王讨紂之罪何与微子而面缚舆榑耶左氏浮夸此其验矣

沙鹿崩梁山崩不系之晋天下之辞也

卜筮圣人所以定犹豫自古记之然尝考之左氏筮敬仲也曰此其代陈有国乎不在此在异国非此其身在其子孙可也必以为姜姓也太岳之後物无两大则牵合矣占嫁伯姬也曰士刳羊亦无盍也女承筐亦无貺也西隣责言不可偿也可也必以为侄其从姑六年其逋明年其死于高粱之墟则附会矣灭项鲁灭之也公谷以为齐灭非也

卫伐邢左氏曰于是卫大旱甯庄子曰天其欲使卫讨邢乎师兴而雨此附会之说也何者仲尼即天也仲尼不与卫灭邢而斥名毁以是知天不与也公羊多紕其曰猷捷不言宋为公子目夷讳也又曰泓之战文王之师不过是也皆紕之紕者也

邓祁侯不杀楚文王楚卒灭邓楚成王不杀晋重耳晋卒败楚然则三甥子玉之言是乎以楚之强而邓杀其君其势未有晏然而已者即杀重耳晋其无君乎楚子重耳死天下之为楚子重耳者何可尽杀也三甥子玉不劝其君以修德自强而区区杀其所忌亦未矣

齐人伐我北鄙公使展喜犒师受命于柳下惠于是柳下惠不知其年然业已为鲁人所推重矣自此距会于商任而孔子生之岁八十有三年孔子长而交于四方则距柳下惠盖百余年也孔子安得与柳下惠为友而盗跖又安得侮孔子哉庄周载盗跖篇余以为此非庄子之言也後人伪为之也

楚杀子玉说者以为晋再胜而楚再败也然而败军之将于法应诛楚所以抗衡中国狎主齐盟者以此故城濮一败即杀子玉泝水一退即杀子上鄢陵一战即杀子反属国一叛即杀子辛国犹有章也栢举丧师囊瓦奔郑楚不能致辟焉而国浸以弱矣

春秋质疑卷五

卷六

钦定四库全书

春秋质疑卷六

明 杨于庭 撰

文公

公即位

按周书顾命四月乙丑成王崩宰臣太保即于是日命仲桓南官毛俾爰齐侯吕汲以二千戈虎贲百人逆王世子钊于南门之外延入翼室宅忧为天下主由是而观君薨嗣君即位岂有旷至月日之外者哉今考春秋书公即位者独昭公客死而定公嗣位在半年之後此意如无君不可以为训不必论至如十一月隐公弑正月桓公即位旷二月十二月僖公薨正月文公即位旷一月二月文公薨十月子卒正月宣公即位旷三月十月宣公薨正月成公即位旷四月八月成公薨正月襄公即位旷六月六月襄公薨九月子野卒正月昭公即位旷五月五月定公薨正月哀公即位旷十月夫桓之继隐宣之继文犹为国有难也其余皆父子继体国家无事而或旷五月六月甚至十月而後立君天下有是事乎故曰国君已即位于初丧逾年改元而书即位者乃行告庙临羣臣之礼亦如近日以明年为元年之例非实至是而始即位也虽然以是考之而益知隐庄闵僖之不书即位胡氏以为不请命于天子者谬矣何以明其然也文公元年春王正月公即位越四月天王使毛伯来锡公命谷梁曰礼有受命无来锡命锡命非礼也夫文公锡命于即位之後则其即位也亦何尝请命于天子哉而何以独苛责隐庄闵僖四公也然则隐公不书即位信为成先君之恶而遂其邪而庄公之为忘父仇闵僖之为继弑君审矣

王子虎卒

卒王子虎左传以为同盟是也公谷谓即会葬之叔服而胡氏信之然按传王子虎卒于文三年越十四年有星孛于北斗叔服尚占宋齐晋之君皆死乱何得以王子虎即叔服耶胡氏既引叔服之言以传星孛北斗而复传王子虎为叔服则其人已死久矣其舛错不伦抑又甚矣

晋杀其大夫阳处父

处父无讥乎檀弓赵文子曰行并植于晋国不没其身其智不足称也

公会诸侯晋大夫盟于扈

诸侯不叙以为不足叙也大夫不名志其专也义不在于公之後至也胡传未合

公孙敖卒于齐齐人归公孙敖之丧

胡氏曰公孙敖之行丑矣出奔他国其卒与丧归皆书于策者以文伯惠叔二子之哀诚无已也余谓不然凡为人子苟非悖逆之极未有不用情于父母者孔子作春秋以公天下而岂区区私一文伯惠叔哉班固酷吏传因张安世子孙贵盛遂恕张汤世儒犹且诋之何况圣人笔则笔削则削莫尊于天子而王不称天莫贵于本国之君而没公不书于册岂以一文伯惠叔而遂纪其不肖之父大书特书不一书也然则何居曰讥其宠有罪焉耳庆父弑二君负覆载不容之罪于法不当置後宠其子公孙敖以为卿固已颇矣敖又不肖聘于京师不至而复而奔莒从已氏焉此不谓之世济其恶而三尺所必诛者哉为之置嗣为之殓而葬之赏斯僭矣郑子皙将死子产使吏数其三罪及其死也尸诸周氏之衢加木焉公孙敖昆弟争室事与黑均而其弃君命而出奔甚于黑之使太史书七子鲁不惟不能讨又从而厚之岂非以季孙叔孙之声势相倚也而为之主乎春秋讥之以着政逮于大夫之渐其所以垂戒後世者详且切矣

子卒 夫人姜氏归于齐 季孙行父如齐

子卒而继之以夫人姜氏归于齐明子弑而母大归也天继之以季孙行父如齐明季孙之与闻乎弑而为之求援于齐也当是时行父为上卿当国倘仲遂有庆父之逆而行父怀季友之忠则恶及视兄弟未必骈首而死于仲遂之手而宣公亦未必立矣身执国政而坐视亚卿之弑君是尚可以言忠乎他日逐归父也行父言于朝曰使我杀适立庶仲也夫则今日之弑非行父主之而谁也或曰行父贤大夫子蔽狱于行父不亦苛乎曰郑子公本谋弑其君子家不可已惧而从之然春秋直书公子归生弑其君而不少贯则杀恶及视即蔽狱于行父焉可也曰然则公子遂可遁乎曰弑君之人此不待贬斥而自见者也

莒弑其君庶其

称国以弑絶之也太子仆帅国人以弑父又以其宝玉来奔此恶而絶之也

附录

晋侯伐卫卫人谋之陈陈侯曰更伐之我辞之卫孔達帅师伐晋左氏曰君子以为古古者越国而谋夫越国而谋古矣不劝之以解怨谢过于大国而亟竞于兵可乎无损于晋而多构怨焉何益

春秋子弑父者三楚世子商臣弑其君顓蔡世子般弑其君固许世子止弑其君买此自开辟以来所未有也其後宋劬杨广更千百年而仅见然顓欲黜商臣而立其弟谋及江芊固淫于般妇义隆欲杀劬隋文欲废广其处心积虑有自来矣许止止于不尝药而圣人诛之比于商

臣般而不贯不亦伤乎语曰为人臣子而不通春秋之义者必陷篡逆诛死之罪则许止之谓矣然其究也止哭泣而死般为楚?所诱杀宋人诛劭隋人弑广独商臣战胜诸侯与晋争霸享国十有二年以善殁子孙世有楚凡此皆天道之不可知者

逆妇姜于齐左以为卿不行公以为娶乎大夫谷以为成妇于齐何居曰恶其忘哀而婚尔

侨如长狄防风氏遗种断其首而载之眉见于轼孔子曰防风氏身横九亩长之至也僬侥氏长三尺短之至也鲁大夫季文子秃聘于齐齐侯使秃者御之臧武仲短狐貍之败国人歌之曰侏儒侏儒使我败于邾

齐人执单伯逆王命也执子叔姬无礼于君母也公谷谓单伯淫于子叔姬文致之词也

季文子使晋而求遭丧之礼以行可谓三思矣东门遂杀嫡立庶而已为之求援于齐何不思之甚乎莒仆以珠玉来奔逐而出诸境公问其故对曰先大夫臧文仲教行父事君之礼曰见无礼于君父者诛之如鹰鹯之逐雀也呜呼无礼于君父孰有大于杀恶及视者哉已不能讨而又与谋焉则何辞以逐莒仆语曰无瑕者而後可以指人行父愧色矣

春秋质疑卷六

卷七

钦定四库全书

春秋质疑卷七

明 杨于庭 撰

宣公

陈杀其大夫?冶

左氏曰孔子曰诗云民之多辟无自立辟其?冶之谓乎余曰是非孔子之言也非之非者也胡氏曰冶虽効忠其犹在宋子哀鲁叔肸之後乎方诸比干自靖自献于先王则未可同日语也余曰亦非也人臣食人之禄则当忠人之事目视其君之昏而噤不一语其若臣子之义何孔子曰危邦不入解者曰仕危邦者无可去之义在外则不入可也?冶既仕危邦自当授命若以宋子哀之去为是而于?冶之死谏訾之是比干不得与微子并称仁也率天下为人臣者视君之昏而遂愒然去之而不顾必胡氏之言夫

齐人归我济西田

归謹及阐书归不书我此书我何公羊曰言我者未絶于我也未絶于我何鲁宣弑逆以济西之田赂齐以定其位而齐亦安然受之至是而君臣岁时朝聘于齐齐人悦其顺已也而来归曰归我济西田田本我田我不得予之齐齐不得取之我也曰归归之不以其道与不以其道而致其归皆春秋所不与也

晋杀其大夫先穀

春秋书杀其大夫某者胡氏以为罪在上故不去其官然其中岂无可杀之罪如晋先都士穀箕郑父之作乱楚宜申之弑君晋先穀之不用命召狄师者乎何以独罪上也余意美恶不嫌同辞有罪无罪观者当自得之耳

宋人及楚人平

陈及楚平不书郑及楚平不书书宋人及楚人平何曰以是为宋危之而又幸之也易子而食析骸而?宋之不亡者几希矣曰及者我及之也岌岌之辞也胡氏以为交贬楚之凌暴贬之可也宋方救亡之不暇不矜之而反贬之乎或曰恶诈也登子反之床而劫制之君子所不与也然则孔子微服而过宋非欤又曰恶专也私以其情告于子反而君不预知非人臣之义也泥乎泥乎失火之家岂暇先言大人而後救火乎况华元登子反之床而起之曰寡君使元则未

尝不稟白于君矣故余以为宋人及楚人平罪盟主及诸侯之不能救宋而宋不得已于楚也非贬宋也

附錄

赵盾弑君孔子曰惜也越境乃免余以为此非孔子之言也人臣无将将则必诛岂一越境可免于弑君之恶乎

先王肇九州分五服要荒以外谓之四裔皆别其疆索示以制防非独异之也盖以内外之分不可淆为後世虑至深远也周室既衰藩篱尽撤无河山而阡之以故时时为患即齐晋大国不免焉曰戎曰山戎曰北戎曰姜戎曰茅戎曰陆浑之戎皆戎也曰狄曰长狄曰赤狄曰白狄曰潞氏曰甲氏及留吁曰廆咎如皆狄也夷曰淮夷蛮曰戎蛮子

楚庄之霸也宜哉若敖氏以反诛已而思子文之治楚也使箴尹克黄复其所命之曰生仁矣哉优于汉宣帝之遇霍氏矣

晋侯治兵于稷以略狄土立黎侯而还黎侯无所仿按卫风式微旧说以为黎侯失国而寓于卫其臣劝之而作是诗也则狄之灭黎当在卫懿公为狄所灭之前五十年于兹矣至是晋侯灭狄复立黎侯也子反之不免也宜哉楚武王以来亡不以令尹为政者子反为司马下令尹一等矣围宋之役华元登其床而告之遂与之盟而退师是自为政也迄于鄢陵令尹子重亡恙而子反执其兵柄于义何居传曰二卿相恶盖子重位在子反之上而政反自子反主之此所以相轧而相倾也欤

王札子杀召伯毛伯下相杀也召伯毛伯不名大臣也大臣而擅杀之以是谓天王为虚位也

取根牟取鄆取郛皆小国也内灭曰取讳也公羊以为邾娄之邑何居

春秋质疑卷七

卷八

钦定四库全书

春秋质疑卷八

明 杨于庭 撰

成公

公即位

公八年秋七月天子使召伯来赐公命则其即位也亦何尝请命于天子哉隐庄闵僖何独以为上不请命也

新宫灾三日哭

公谷曰新宫何宣公之宫也宣公则曷谓之新宫不忍言也灾而三日哭礼也成公为无讥矣以为宫成而主未入宣公薨二十八月而尚未迁主则胡氏之臆说也

立武宫

立武宫杜预以为鲁人旌鞏之功作先君武公宫以告成事示後世是也邲之役潘党劝楚子立武军以无忘武功楚子曰武有七德我无一焉何以示子孙其为先君宫告成事而已今鲁之战于鞏也忿兵也计其功则借人也借人之力以救其死若之何其旌之小国幸于大国而昭所获焉以怒之亡之道也胡氏以宫庙有毁而无立而不着其旌鞏之功之不可则鶡突也晋侯使韩穿来言汶阳之田归之于齐

恶晋失信也春秋之法曲在内则讳曲在外则不讳晋侯使韩穿来言汶阳之田归之于齐曲不在我也

卫侯之弟黑背帅师侵陈

黑背称弟亦是因其事而书之耳仲尼以天自处胡氏谓齐侯之弟年生无知弑襄公黑背生公孙剽其後出卫侯衎而代之故圣人皆以为有宠爱之私而称弟然其事在其子孙数十年之後而圣人逆探其事而贬其父于数十年之前必不然矣

晋立太子州蒲为君

晋侯獯在也而子州蒲立为君以伐郑春秋书曰公会晋侯齐侯宋公卫侯曹伯伐郑而其下又书曰晋侯獯卒若二晋侯然者所谓父不父子不子而春秋所由作也则亦不待贬斥而恶自见矣

齐人来媵

伯姬虽贤卫人晋人媵之礼也齐人媵之非礼也礼诸侯嫁女同姓媵之异姓则否又况二国来媵是一娶而九女也礼也三国媵则一娶而十有二女矣乌乎礼

负刍杀太子而自立

负刍杀太子而自立则弑君也而春秋不书何也曰此与陈佗杀太子免而自立同罪皆因其不告而不书者也然而蔡人杀陈佗则予以讨贼之义而晋侯执曹伯归之京师则予其为伯讨以是知春秋之诛乱臣贼子者至矣岂因其不告而遂没之乎

仲婴齐卒

公谷胡氏曰婴齐者公子遂之子公孙归父之弟也归父出奔齐鲁人徐伤其无後也于是使婴齐後之曰仲婴齐乱昭穆也弟不可後兄也余曰何由知其非後襄仲乎习胡氏者曰礼孙以王父字为氏子不可以父字为氏故知仲婴齐之必後归父也余应之曰不然婴齐以父字为氏此正所以讥鲁也何以明其然也季孙行父公子友之子也于法当称公孙今称季孙者正以公子友之为季友而生而赐氏也襄仲亦生而赐氏而俾世其卿者故其卒曰仲遂其子归父既奔而鲁立其次子婴齐以为遂後安得不称仲婴齐乎行父可以父字为氏而称季孙婴齐独不可以父字为氏而称仲乎然则何讥曰弑君之人而生赐之氏而世其卿则春秋之所不与也

会吴于锺离

会吴于锺离于柤于向胡氏以为罪诸侯不敢与之敌者非也晋君方明诸侯方睦吴虽崛强何至诸侯不敢与之敌乎观向之会吴告败于晋晋士匄数吴之不德也而退之则吴岂能有加于晋者圣人殊而外之以为吴蛮夷也僭王也召而与之会是吴就中国也其志可嘉也戚之会是也故进而称人即而与之会是中国就吴也其渐不可长也锺离柤向之会是也故抑而举号所以谨内外之防者至矣

曹伯归自京师

胡氏以为讥天王之释有罪者是也然当其时天王亦虚位耳晋不许之归王敢归曹伯乎曰曹伯归自京师以为不宜释而释必有任其责者矣

刺公子偃

杀无罪也穆姜之请逐二子而公不可也姜怒公子偃公子鉏趋过指之曰是皆君也公以一言之忤而遂甘心于偃君子以为周官三刺之法不如是矣或曰偃与谋也与谋之恶何如叔孙侨如之主谋乎逐侨如而不诛而顾诛其与谋之公子偃何居

晋弑其君州蒲

称国以弑外之也书身为元帅执其君而弑之以车一乘葬之于翼东门外而举国之人莫以为非也则天地将灭亡矣圣人伤之故曰晋弑其君州蒲如莒弑其君庶其之例胡氏说何鹵突也

附录

戎伐凡伯于楚丘以归经明言戎伐矣而公谷以为卫伐之王师败绩于茅戎经明言茅戎矣而公谷以为晋败之舛矣

鞌去齐五百里袁娄去齐五十里一战而绵地五百里逼与之盟其不盟于城下者几希齐既求成朝而授玉忿亦可以纾矣郤克趋而进曰是行也为妇人之笑客也甚矣其横也郤氏之无後也宜哉

卫迁于帝丘则书晋迁于新田则不书者何也卫书迁志狄围卫也不得已也晋之迁有所择而图之也郟事吴晋士燮以诸侯之大夫伐郟以其事吴也是时晋方使巫臣通吴以制楚而即与吴争郟尚谓之好相识乎总之吴晋皆唯利是视者则亦不待黄池之役而争为盟主矣

左传成十六年夏四月滕文公卒盖昭公之子成公之父也自此距战国二百年而滕文公问三年之丧及井地于孟子是滕有两文公矣卫州吁有宠于父庄公左氏曰庄公娶于齐东宫得臣之妹曰庄姜美而无子卫人所为赋碩人也距二百年而蒯瞶亦諡曰庄公弑于髡发之已氏是卫有两庄公矣諡以易名周制也今文武大臣父子同諡者必请而更之而卫及滕以耳孙而同其远祖之諡而臣子不能改也有是事乎不宁唯是齐孝公昭昭公潘皆桓公子也孝公名昭而其弟潘嗣諡为昭公是以孝公之名为諡也楚康王名昭而楚子轸諡昭王是以康王之名为諡也宋公王臣諡成公历四世而平公名成是又以祖諡为名矣夫諡以易名名可讳諡不可讳也先公先王名昭而嗣公嗣王諡昭将讳之乎抑不讳乎先公諡成而四世之孙名成将不讳乎抑讳之乎凡此皆传记之可疑而理之不可晓者吾姑存疑焉春秋质疑卷八

卷九

钦定四库全书

春秋质疑卷九

明 杨于庭 撰

襄公

楚杀其大夫公子申 楚杀其大夫公子壬夫

国家之败由官邪也官之失德宠赂章也申及壬夫政以贿成何得无罪观者当自得之可也

臧孙纆败于狐骀

狐骀之败不书讳之也

莒人灭鄆

灭鄆者莒以兵灭之也故晋人来讨曰何故亡鄆季孙宿如晋听命昭四年九月取鄆左氏曰莒乱着丘公立而不抚鄆也若谓以异姓为後而自灭其嗣故特书曰莒人灭鄆如公谷胡氏之说则亦凿矣秦始为吕不韦之子朱子作纲目未闻于嬴秦之庄襄王书灭况圣人如天岂有以舅出为後之事而指之曰灭鄆者哉又况灭鄆在襄六年而襄五年经书叔孙豹鄆世子巫如晋公羊曰舅出也莒女为鄆夫人立其出也盖即指巫言之也巫以舅出後姑父称鄆世子则鄆子卒而巫嗣必不书灭鄆矣

会吴于柤遂灭偃阳

合十有二国之诸侯而会吴于柤圣人已殊而举其号而况为通吴晋往来之道而遂灭无罪之诸侯乎春秋书灭者亡国之善辞上下之同力也偃阳子实俘以归未尝死于难也而书灭偃阳若国灭君死之者所以深罪晋也曰遂遂之者甚之也

戍郑虎牢楚公子贞帅师救郑

胡氏曰戍郑虎牢罪诸侯也公子贞救郑善之也余曰非也郑固反复之国也牺牲玉帛待於境上口血未乾而背之久矣自诸侯之戍虎牢而郑人失其险于是乎楚狼狈而救之不可得也曰戍郑虎牢虎牢固郑之虎牢诸侯不得而有也曰救郑见楚之急于得郑而欲救而不能也则所以制郑者善矣若以为伐而书救未有不善之者也而遂指之曰罪晋则郑背盟即楚

春秋所恶萧鱼之会方予晋之服郑而又罪之乎

郑公孙舍之帅师侵宋

郑侵宋将以怒晋而致死于我乃固与晋则子展之谋也夫欲与晋而先怒之谋亦谲矣此与晋赵穿侵崇以求成于秦何异

十三国伐秦

是役也报栢之败也于是栢黶不用命辄以其师归晋人谓之迁延之役谁尸之乎则荀偃已偃为主帅仗钺临戎虽君命有所不受而况黶为之属寮乎伐偃阳不克荀偃士匄请班师知罃怒投之以机出于其间曰七日不克必于尔乎取之偃匄躬受矢石而偃阳举矣荀偃岂不闻乎若之何身为主帅师行无纪其始令曰鸡鸣而驾唯余马首是瞻固已非矣及栢黶专愎自用马首欲东而偃遽以师退曾不能按军法致辟焉专阋之谓何于晋辱矣书曰叔孙豹会晋荀偃齐人宋人卫北宫括郑公孙蚤曹人莒人邾人滕人薛人杞人小邾人伐秦言罪之在也

卫侯衎出奔齐国人立公孙剽

襄十四年卫侯出奔齐卫侯者衎也于是国人立剽十六年会溴梁十八年同围齐二十年盟澶渊二十一年盟商任二十二年盟沙随二十四年二十五年两会夷仪其书卫侯者剽也二十五年八月卫侯入于夷仪者衎也于是二十六年剽弑衎入十二年之间而卫有两卫侯可乎先王之制国君亡不受之天子传之先君者衎与剽并无王命父命而窃有其国天讨不加诸侯列于会诸大夫国人莫以为非故圣人因而书之曰卫侯不没其君卫之实盖伤之也

戚之会

卫孙林父逐其君衎而立剽晋侯谋于荀偃偃曰卫有君矣伐之未可以得志不如因而定之会于戚谋定卫也人臣之恶孰有大于逐君者乎晋为盟主宜以大义倡诸侯致讨于卫轅孙林父于市谋于卫衆置君而後去之可也奈之何不唯不能讨反会于逆臣之私邑而定之乎悼德于是乎衰矣一悼公也用韩厥则克彭城讨鱼石用知罃魏绛则三驾伐郑而楚不敢与之争及其晚节末路用荀偃士匄并属庸才则卫大夫逐君而不能讨以此知人君不可一日而无谋臣而悼之所以止于伯也齐桓晚年亦多衰德由于管仲一死而齐遂无人以悼方桓岂不相肖哉王道之大兢兢业业一日二日万几必不始勤而终隳如桓悼矣

取邾田自漈水

鲁之借力于晋者二鞏之战取汶阳之田于齐书曰取汶阳田不系之齐此执邾子曰取邾田自漈水者何也圣人作春秋如衡之平如水之止岂有成心于其间哉齐顷公伐我则汶阳之

田固已夺而有之矣鞏之战取之以归于我而田固我本有之田也安得以取齐田书乎祝柯之盟则异是襄十六年晋人执邾子以归邾子者宣公慙也当其时宣公果夺我田则晋必归之于我矣十七年二月庚午邾子慙卒悼公继立是年冬邾人伐我南鄙止于书伐未闻取我田也十八年同围齐而邾子即以十九年之春正月执矣然则取邾田自漯水者乃晋侯恶邾之伐鲁而割其田以与鲁也非反鲁侵地也诸侯土地受之天子传之先君晋人割以与鲁鲁人藉晋力而取之邾皆义之所不敢出者况邾人伐我执之足矣又取其田不几于蹊田夺牛之诮乎此书法所以异于取汶阳田也交讥之也至于执诸侯而称人又不归于京师则亦不待贬斥而自见矣

盟于澶渊

齐为无道十二国之诸侯以兵围之而桀骜如故也至士句侵齐至谷闻齐侯卒乃还而齐始盟于澶渊矣德之足以服人如此夫

陈杀其大夫庆虎及庆寅

齐之高厚郑之公子嘉楚之公子追舒陈之二庆罪皆可杀也以为罪累上者泥也余所谓有罪无罪观者当自得之也

齐侯伐卫遂伐晋 救晋次于雍榆

伐卫遂伐晋志无伯之始也盖惧之也救晋书次讥为义之不勇也

晋执卫侯衎

伯主执诸侯未有不书者平公执卫侯衎囚之于士弱氏则不书何以是为不足书也何者为臣执君罪一执而囚之而不以归于京师罪二齐侯郑伯朝晋为卫侯请而晋怒未释也俟其归卫姬于晋而後释卫侯罪三若是则三纲沦九法斁而人道或几乎絶矣圣人至此悯之甚惧之甚故其执卫甯喜也称人而其执卫侯也削而不书以存中国也其意远矣

豹及诸侯之大夫盟于宋

豹不书族削之也削叔孙所以遍罪诸侯也盟于宋而中国益衰矣

公如楚 天王崩 楚子昭卒 公在楚

灵王不书葬鲁不赴也天王崩诸侯不奔丧又不使大夫会葬而亲禭于僭王之楚子此所谓失其本心者也则亦不待贬斥而恶自见矣春王正月公在楚春王正月公在乾侯岁首必书公所在者臣子之义也朱子作纲目书帝在房州意仿此

公至自楚

公至自楚何危之也何危乎外之屈辱于大国而内之迫于强臣取卞以自封故其谓公冶曰吾可以入乎微荣成伯则亦不待鸛鹄来巢而襄公为昭公矣

吴子使札来聘

吴入春秋止举其号至是进而称子又君臣始并见经所谓夷狄而中国则中国之者也札不称公子亦如秦术楚椒之类若以为让国酿乱贬而削其公子则孔子之作春秋也为天下乎抑亦为区区之季札乎以为贤而责备之深则又刻矣

公薨于楚宫

公薨于路寝正也于楚宫非正也以此推之参之易箴由之结纓所谓行一不义杀一不辜而得天下不为也附錄

礼唯诸侯见天子稽首两君相见则拜哀之十七年公会齐侯于蒙齐侯稽首公拜齐人怒孟武伯曰非天子寡君无所稽首乃襄之三年盟于长檣也公稽首知武子辞孟献子曰以敝邑密迩仇讐寡君唯君是望敢不稽首襄之二十四年郑伯朝晋请伐陈稽首范宣子辞子西曰以陈之陵虐敝邑寡君是以请罪焉敢不稽首则是晋侯名为方伯而俨然尊之如天子矣

会吴于向姜戎即事于会而不书削之也以是知申之会列淮夷于诸侯以为诸侯皆可贬也

宋人献玉于子罕子罕弗受曰我以不贪为宝尔以玉为宝若以与我皆丧宝也不若人有其宝谊哉贤于韩起之求玉环也已

齐侯获臧坚使夙沙卫唁之坚谢曰君赐不终抑又使其刑臣礼于士遂自杀平陰之役夙沙卫殿殖绰郭最曰子殿国师齐之辱也乃代之殿赵同为汉文帝骅乘袁盎伏车前曰陛下虽乏人奈何与刀锯余人载乎上笑下赵同古之以寺人为耻如此今亡矣夫

臧孙纆出奔无罪乎曰恶得无罪立嗣以长谁敢奸之季武子欲舍公弥而立纆私也北面重席新樽絜之召悼子降逆之及旅而召公鉏使与之齿是则逢迎季孙之意而成其私而长幼之序紊矣公鉏因之以立羯而仇臧孙不亦宜乎孔子曰臧武仲之智也而不容于鲁作不顺而施不恕也

合左师诸侯之良也伊戾诬世子痤则证之痤召佐则聒而与之语陷宋公于不义谁之咎欤倡谋盟宋中国之衰自此始而反求免死之邑于宋公子罕讥之是矣

陈灵公之弑起于夏姬相衣之戏齐庄公之弑起于东郭姜拊楹之歌信乎色之足以败家亡

国也然楚庄能伸大义以讨少西氏而晋平公不能于是乎崔杼以赂免而晋霸自此替矣

书城杞罪之也弃诸姬而夏肆是屏则平公之昏而二三执政不能无罪焉尔

宋伯姬卒于火贞而过焉者也君子以为不必待姆焉可也何也纪叔姬不可不归之鄫而宋伯姬可以不逮乎火也事固有轻重之别也虽然不谓之贤不可

晋之衰赵孟之偷为之也继之而韩起偷益甚至范鞅荀跖求货于诸侯益不足道矣

春秋质疑卷九

卷十

钦定四库全书

春秋质疑卷十

明 杨于庭 撰

昭公

虢之会

宋之盟豹削族此复书叔孙豹者何也再会而恬不知怪圣人以是为不足削也

取郕

取郕之役微叔孙豹鲁不国矣故不书季孙宿帅师伐莒取郕而书取郕若不知为谁取之者志宿之横豹之忠也

郑杀其大夫公孙黑

黑为无罪乎子产数之备矣称国以杀余所谓有罪无罪观者当自得之固不嫌于同辞也胡氏以为郑人初畏其强不之讨也因其疾而幸胜之亦云殆矣不亦迂乎

公如晋至河乃复季孙宿如晋

礼诸侯之丧士吊大夫共葬事未闻君自奔丧者也而况区区伯主之嬖宠非伉俪乎至河见拒辱亦甚矣亦可以止矣而复使冢卿致服焉书之以见昭公之不能以礼自强而亟媚于大国也盖伤之也谷梁以为公如晋不得入季孙宿如晋得入而胡氏信之遂以为昭公失国之由季氏逐君之渐晋人下比之迹溺其旨矣

取郕

取郕不系之莒讳之也书取郕则知向之灭郕莒以兵灭也

公如晋 莒牟夷以牟娄及防兹来奔公至自晋

公方在晋也而牟夷以三邑来奔谁受之乎季孙受之也纳畔人而利其土于是晋侯以是罪公几于见执则宿之专横无君不待意如之逐昭公而後见矣然则范鞅所谓请归之间而以

师讨不亦韪乎曰鞅本党于季氏已而竟无讨也故书曰季孙宿如晋传以为拜莒田也晋侯不唯不能讨反以为知礼而重其好货则晋之不足为盟主抑又见矣春秋诸侯不顾礼义而一视强弱为大小是故莒有叛人而鲁纳之帅师以讨而又诈败之也告于伯主而伯主反宠其使臣而厚贿焉为小国者不亦难乎

暨齐平

暨齐平左氏以为燕人请平于齐是也于是齐侯将纳简公燕人归燕姬贿以瑶璆玉楮舂耳不克而还胡氏以为鲁暨齐平然尝考之春秋前此则郑来输平为隐公狐壤之战也宋及楚平为围宋也後此则及齐平及郑平为定公尝侵郑侵齐也自夷仪以来齐鲁同盟并无侵伐何故而暨齐平乎胡氏盖泥于下文叔孙舍如齐涖盟而遂为此说而不知大夫聘于列国而涖盟此春秋常事如荀庚孙良夫郤犇者皆是也固与暨齐平无与也

意如至自晋

胡氏曰晋执季孙为邾莒之不供而非有扶弱击强之义也其终归之为土地犹大所命能具而非有为夷执亲之悔也违道甚矣然则意如无贬乎曰意如去族罪之也身为大臣当以国体为重既执于晋赖子服惠伯力争得免惠伯请从晋惠于会则羊舌鮒以除馆西河恐喝之而意如惧遂奉头鼠窜不待礼而归其辱国亦已甚矣以故圣人削其姓氏以为世戒不然叔孙舍亦见执于晋者其至自晋何以书叔孙乎知书叔孙之为褒则知削季孙之为贬矣

莒子去疾卒

莒不书葬胡氏以为意如专政而莒尝诉其取郚取郕之罪于晋而执之以是恨莒故独不会其葬也非也莒本杂夷有号而无諡如所谓着丘公郊公是已故春秋二百四十九年之间虽滕薛邾小国亡不书葬独于莒缺焉盖莒自外于礼法则回而外之也必以是罪季孙误矣

蔡朝吴出奔郑

朝吴出奔志谗人之乱国也于朝吴乎何尤胡氏因费无极诱朝吴之语而遂以为罪吴者过也

曹公孙会自?出奔宋

自?出奔据其事而直书之也非必以为子臧之後而贤之也尧舜为父朱均为子贤不肖自不相及而何为乎以贤而并恕其子乎至谓黑肱以滥来奔不言邾者为叔术讳则其说益远矣

盗杀卫侯之兄縶

左氏谓齐豹杀之是也以为宗鲁杀之则齐氏戈击公孟宗鲁固已以身死之矣左氏述仲尼之言以为齐豹之盗孟縶之贼汝何吊焉正恶宗鲁食奸受乱盖不义犯非礼而至于杀孟縶者则固与宗鲁无与也胡传释豹不诛而归狱于宗鲁误矣

刘子单子以王猛居于皇入于王城

王室而既卑矣景王溺爱子朝几夺嫡矣猛虽正无宠于先王矣非大臣以之则国本摇而宗社不几于殆乎幸而有刘单左右王居于皇入于王城以定其位亦春秋之所予也盖衰世之意也胡氏罪其挟天子以令诸侯以为上下舛逆为後世戒然当是时尹氏召伯毛伯立王子朝既为不正而宜罪至于立君之正则又非之大臣宜如何而可而春秋许首止之盟何居

吴弑其君僚

称国以弑外之也僚不当立既立之矣又使光得而弑之此乱道也

黑肱以滥来奔

不系之邾谷梁以为别乎邾者是也以为贤叔术而讳其子者公羊之谬也公在乾侯鲁无君也而季氏纳黑肱君子以是为叛逆自为党矣不书邾惧之也

附錄

昭公年十九而有童心居丧而不戚穆叔不欲立之是也但其言曰若果立之必为季氏忧夫鲁之立君以为国也上之则周公鲁公之祖祧下之则龟蒙鳧绎之臣民岂为区区一季氏乎鲁人知有季孙而不知有社稷穆叔虽贤亦习于其俗而不自觉耳向戌倡弭兵之说赵孟与诸大夫谋曰弭兵而我弗许楚必许之以召诸侯则我失为盟主矣然乎曰弭兵美名也我弗许是携诸侯也许之而修德行仁君臣辑睦以观衅于诸侯其可也宋华元尝合晋楚之成于西门外矣栾书韩厥之徒俟楚背盟而我有词于伐遂捷鄢陵晋霸如故也则向戌弭兵之说于晋何伤乎唯盟宋之後而晋失其政君弱臣强遂一切无志于诸侯?不当城而合诸侯以城之蔡般弑父莒人弑君而不能讨驯至于楚灭陈蔡而不能救而晋亦不复主夏盟矣此则晋君臣偷安之罪非盟宋之罪也

君薨士吊大夫共葬事先王之制也大夫吊卿共葬事自晋文襄始也鲁侯之奔大国丧自宣公始也赵孟卒而郑伯如晋吊则不但奔大国之丧并其执政之丧而奔之矣欲政不逮大夫得乎

左氏谓武王成王康王封建亲戚以蕃屏周又曰管蔡郕霍鲁卫毛聃郕雍曹滕毕原酆郇文之昭也邲晋应韩武之穆也凡蔣邢茅胙祭周公之胤也封周公支子有诸乎曰昔者成王以周公有大勲劳留相王室故封其冢子伯禽于鲁而别封其支子于凡蔣邢茅胙祭此报功之

特典非诸兄弟所敢望者也太公亦元功也有支封乎曰其详不可考矣然尝考之襄二年齐姜薨齐侯使诸姜宗妇来会葬召莱子莱子不会伐而灭之繇是而观莱亦太公之後以支子封者矣继体守文之主可封建乎曰否成王虽尝封康叔于卫封唐叔于晋封微子于宋封熊绎于楚然皆举先王之勤劳或先王之少子也康王不可考即有之亦成武王成王之遗意云尔昭王穆王而後絕不闻有封建者传曰周之始封千八百国兄弟之国十有四人姬姓四十余人则业已布满天下矣所余者止方千里之王畿耳若继体守文之主而皆分封其子弟一如开国之初则不数传而王畿之土地已尽天子将安所奉宗庙待诸侯乎故余断以为封建必始王者乃行之也或曰越少康之後郑及申宣王所封也何欤曰少康宣王拨乱世反之正与寻常继体守文者不同故少康复国而别封其支子于会稽宣王中兴而封其舅申伯于申封其弟友于郑此又不可以一律论者後世帝王虽继体守文亡不封建子弟汉或割诸侯王一郡以封封者唐以後仰食县官至于今而日苦不给则何不取周事观之也汉明帝曰我子安得与先帝子等以故封域半楚淮阳庶几古人之用心矣

叔向晏婴私论本国失政说者谓不欲与张趯同讥然二臣为国上大夫君有过则当谏谏而不听则当去不力诤而私述之于外国之使非纯臣也况叔向既知晋无政而平丘之会又以其甲车四千乘恐喝诸侯不可谓仁违母命而娶于申公巫臣以丧羊舌氏之族不可谓智拂衣而从行人子朱为师旷笑不可谓勇季札规之曰子好直必思自免于难有繇来矣藏水发冰王政之大者也所谓冬无愆阳夏无伏陰春无凄风秋无苦雨雷出不震无菑霜雹厉疾不降民无天札皆实语也胡氏谓此一事耳安能使四时无愆伏凄苦之变乎则亦浅之乎知王政矣

叔孙豹贤大夫也宿一庚宗妇人又惑于号牛胜天之梦而遂身死人手两子见杀叔孙氏几于覆宗是以君子谨于微也

立子以长乎晋悼公有兄而不慧不能辨菽麦不立立悼公卫灵公之兄絜足不良不立立灵公然则文王舍伯邑考而立发也必有以也非若晋献之欲立奚齐汉高之宠爱如意也

公孟絜公孟字絜名也定十二年卫公孟彊帅师伐曹彊絜之子也于法当称公孙彊曰公孟彊是以父字为氏也岂灵公德絜让已遂生而赐氏使世其卿欤取以证仲婴齐则婴齐信乎以父字为氏而其为後父仲遂而非後兄归父也明矣

鸛鹄来巢左氏引文武之世之童谣附会也何也往馈之马季氏馈马也公在乾侯徵褰与襦公出而每岁求从者之衣屨也稠父丧劳稠昭公也宋父以骄宋定公也往歌来哭丧归也童谣未必如是之明且显也左氏诬也

晋中军帅称将军魏舒召阎没女寬食比置三叹问之对曰岂将军食之而有不足是以叹汉人称丞相亦曰将军灌夫对田蚡曰将军乃肯幸临况魏其侯又曰将军贵人也记卫弥牟亦称将军文子盖均之执国政之称云尔

春秋质疑卷十

卷十一

钦定四库全书

春秋质疑卷十一

明 杨于庭 撰

定公

立炀宫

左氏及杜预之说是也意如逐君而惧乃请祷于炀公已而昭公死于乾侯意如以为得默佑矣故立其宫如今里佺还愿之类夫叔孙舍以他人逐君而使祝宗祈死意如乃亲逐其君而祷于炀公以祈君死其忍心害理恬然亡忌憚极矣胡氏但谓宫庙有毁而无立而不着季孙之罪则鹮突也

季孙意如卒

卒意如伤之也輦不书卒犹以讨贼望国人焉至是无望矣鲁事益不可为矣

从祀先公

左公谷皆以为顺祀闵僖是也鲁之跻僖公非礼也国人不服久矣阳虎专鲁而欲取悦于衆故假公论而顺祀先公所谓其事则正其情则非也胡氏以为昭公至是始得从祀于太庙夫季氏之忍心于昭公何所不至观其葬而絶其兆域使不得同于先君又欲加以恶諡及祷于炀公而立其宫则其心亦何难于靳昭公之庙祔哉但历考三传并无此事而至冯山始创言之夫左氏公谷皆距孔子不远其说似必有据今不信三传而信千余年後之冯山此余所断乎其不敢从者且季氏之逆此传所谓不待教而诛者奚必以昭公祔庙一事坐之本欲诛乱臣贼子而反令乱臣贼子解脱也

薛弑其君比

称国以弑外之也

公会齐侯卫侯于牵齐侯宋公会于洮

春秋之初患无王也卫朔得罪于主而公会齐人宋人陈人蔡人伐卫纳朔春秋之季患无伯也范中行氏得罪于君而公会齐侯卫侯于牵齐宋又会于洮以救范中行氏呜呼此乱臣贼

子之所以接踵于天下而仲尼所以作春秋欤

卫世子蒯聩出奔宋

辄可以拒父乎曰蒯聩之族属未絕也灵公未尝废之而更立太子也故书曰卫世子蒯聩出奔宋又曰晋赵鞅帅师纳卫世子蒯聩于戚而辄拒父之罪昭昭矣齐国夏卫石曼姑帅师围戚之罪着矣

妣氏卒 葬定妣

何以不称薨何以不称葬我小君定妣疑者曰削之也削之何恶夺嫡也孰谓定哀之际则微乎

附录

意如卒阳虎请以璵璠斂仲梁怀弗与曰改步改玉阳虎欲逐之公山不狃曰彼为君也子何怨焉盖阳虎欲以君礼斂季孙而怒仲梁怀之不顺已公山不狃以为怀之言为鲁君也注以为指意如误矣夫君不在而摄祭但可代君行礼耳焉有公然佩君之玉者乎忍心至此其得死幸尔公山不狃非能忠于鲁君而其责阳虎则正矣

胡氏曰定公虽受国于季氏苟有叔孙婣之见不赏私劳致辟意如以明君臣之义则三纲可正公室强矣是何言之易乎从自古以来不幸而立于权臣之手则必须从容濡忍以观其变若力不足而亟欲除之则未有不反受其螫者也魏主髦不胜其忿而欲讨司马昭反为所弑是矣且胡氏不见夫昭公之事乎然则定公如之何曰晏子之对齐景公曰唯礼可以已之庶几矣

申包胥乞师于秦倚墙而哭日夜不絕声勺水不入口者七日其忠过于束帛乘韦之茅夷貊哉反国而逃赏其仁过于以璧沉河之舅犯矣

子西为王舆服以保路国于脾泄闻王所在而後从王昭王不以为忌子西不以为嫌此所以能复楚也萧王击铜马贼军中不知王所在或言战歿者吴汉曰诸君何患王兄子见在南阳真若主也意仿此诸侯皆叛晋矣而鲁独後于是乎为晋侵郑为晋侵齐至于叔还如郑泣盟而後叛晋鲍文子所谓鲁未可取也上下犹和衆庶犹睦能事大国而无天菑者以此孔子曰鲁一变至于道是固一验欤

仲孙何忌魏曼多公羊以为讥二名二名非礼也非也考之春秋隱公名息姑闵公名启方成公名黑肱此我君之二名者也齐桓公名小白晋文公名重耳灵公名夷臯成公名黑臀厉公名州蒲秦穆公名任好宋襄公名兹父此伯主之二名者也无骇庆父行父婴齐此我大夫之二名者也荀林父夏徵舒韩不信乐大心此外大夫之二名者也二名何讥焉孔子之母名徵

在则固已二名矣

赵鞅前书入于晋阳以叛後书归于晋归者易辞也如入无人之谓也晋于是乎不可为矣

秦公子鍼以富惧选则奔晋卫公叔戌以富见恶则奔鲁信乎富之足以贾祸也石卫尉曰奴輩利吾财耳收者曰知财之为患何不蚤散之耳

春秋质疑卷十一

卷十二

钦定四库全书

春秋质疑卷十二

明 杨于庭 撰

哀公

伐邾取漵东田及沂西田

入定哀而鲁政益不可为矣何者宣成襄公之世君虽失政而季文子为冢卿孟献子为介卿国犹有人也至昭公则季氏横矣然叔孙豹及舍世济其忠故虽以宿之取郛而豹犹能拒乐鮒之请带而不与虽以意如之逐君而舍犹能祈死而耻与之同列则三家未尽不肖也唯夫定哀之世君既失政而季氏若斯若肥叔孙氏若不敢若州仇孟氏若何忌若彘皆碌碌弩庸但知封殖而不为国家经久之虑者即以邾事言之大蒐于比蒲而来会已而朝公公薨而来奔丧邾之事鲁亦云可矣有何患恨而伐之无已乎政由甯氏祭则寡人其亦可哀也已

城啓阳 城西郛 城毗 城邾瑕

四城何备晋也小国幸伯国之败而畔之曲在我矣已惧其讨而城以备之以是为不能以礼自强而区区于城守亦未也

蔡杀其大夫公孙姓公孙霍

此弑君之党也恶得无罪经书杀其大夫某者美恶不嫌同辞有罪无罪观者自得之可也胡氏谓二公孙盖尝谋国不使其君至于是而弗见庸者故称国以杀而不去其官则曲说矣

齐国夏及高张来奔 齐陈乞弑其君荼

古之贼臣将有无君之心则必先翦其羽翼而後动于恶而翦其羽翼莫急于世臣故孟子曰所谓故国者非谓有乔木之谓也有世臣之谓也董卓弑逆则灭太傅袁隗之族曹操谋篡则杀孔融盖世臣与国同休戚而乱臣贼子往往以为不便而亟除之高氏国氏之为世臣于齐久矣二臣不奔则荼未必弑阳生未必入而陈乞亦未必得政于齐也是故伪事之每朝必骖乘以悦其心又为之反间于诸大夫以构其怨而高张国夏果不容于齐矣逐而奔鲁则君侧无人而吾可以弑君而莫之忌矣春秋书陈乞弑其君荼而系于二子来奔之下以见国家不可一日而无世臣而语所谓虎豹在山藜藿为之不采者此也然则刘子单子以王猛居于皇入于王城者岂直讥其挟天子以令诸侯如胡氏说乎夫亦谓王猛之不可无二子云尔

会吴于郕 会吴伐齐

吴楚僭王春秋皆以不治治之者也然楚始称荆继进而称人又进而称子称其大夫自僖文以至定哀之世而楚遂与齐晋宋卫诸国亡异焉独于吴也伐郟入州来灭巢会善道俱举其号会戚称人矣使札及栢举称子矣而至于相与郕之会长岸艾陵之战郢之入齐鲁之伐又仅仅以号举黄池称子曰及以外之其恶之尤有甚于楚者何曰楚虽暴横齐晋之君亟攘之召陵城濮鄢陵萧鱼霸中国者未有不摈楚者也独吴兴于霸图销歇之後而晋方引之以制楚欲求次阨一创渺不可得是故会鲁伐齐争先盟晋入郢之役君与大夫班处其宫无复人礼徵鲁百牢藩卫侯之舍凡此皆楚所无者此春秋所以亟恶之也欤不然泰伯至德仲尼所称何独于其後裔削之也然以鲁之秉周礼而亟会之于郕于橐臯又引之以伐齐其于周公兼夷狄之义悖矣仲尼所深悲矣

吴救陈

凡书救未有不善之者也而吴举其号不进而称人何居曰吴方无道争雄于楚其伐陈非有拯危扶颠之意故季札谓二君不务德而力争诸侯民何罪焉者以此果吴修方伯连帅之职以獎王室以抑强楚念胡公大姬神明之胄而拯溺救焚以援之圣人当亟予之之不暇肯责之乎

孟子卒

胡氏曰讥同姓也此不独胡氏知之人人知之者也然礼一君一夫人犹今之一帝一后昭公君鲁三十有二年矣国人不以为君乎既以为君而祀于庙岂有无一夫人祔享者乎虽曰娶于同姓然使其以夫人之礼丧之赴于诸侯反哭于寝即书曰夫人孟子薨葬我小君孟子亦可也乃今考之左氏孔子与吊适季氏季氏不纚放絰而拜夫礼义折衷于圣人使孟子非小君则孔子何以絰而吊既絰而吊则孟子固昭公之夫人而为臣子者不得以私怨贬夺之矣礼初丧男纚女髻不纚者不服丧也不服丧者不以为夫人也不以为夫人者季氏恨昭公故也夫人臣而逐其君恶亦甚矣又废其二子公衍公为使得不得立又沟而絶之于先公之墓俟孔子为司寇而後合之又废其敌体之夫人使不得祔于庙而为之丧也不亦伤乎夫子作春秋而直书曰孟子卒季孙之罪始无所容于天地之间矣胡氏舍季氏丘山之罪而第举娶同姓以为言此一陈司败能道之何待圣人之笔削乎或曰记曰夫人之不命于天子自鲁昭公始也则是昭公以娶同姓为嫌不敢请命于天子耳于季氏何尤曰周天子之寄虚名久矣仲子成风皆以诸侯之妾而归之贈况于君夫人乎昭公薨越三十年而後孟子卒使季氏果以小君之礼礼之则天王亦必追而锡之命或贈之矣天王之不加礼于孟子也则鲁不以为夫人也

附錄

蒯瞶耻母之淫而欲杀之而辄又藉口于王父以拒父均之乎无父之人也有王者作直须两

废之而立公子郢耳孔子不为卫君非但不为辄也两不为也公羊谓拒父为尊王父而又予齐国夏卫石曼姑为伯讨何居

小邾射以句绎奔鲁曰使季路要我吾无盟矣使子路子路辞冉有曰千乘之国不信其盟而信子之一言子何辱焉对曰鲁有事于小邾死城下可也彼不臣而济其言是义之也由弗能子路大节如此夫岂无故而死孔悝之难乎彼其心盖误于以王父辞父命之说而谓辄之拒父为当也故其言曰太子焉用孔悝虽杀之必继之又曰太子无勇若燔台半必舍孔叔他日闻夫子正名之论则直笑以为迂繇其见偏宁杀其身而不顾也所谓弑父与君亦不从也公子荆之母嬖将以为夫人使宗人衅夏献其礼对曰无之公怒曰汝为宗司立夫人国之大礼也何故无之对曰周公及武公娶于薛孝惠娶于宋自桓以下娶于齐此礼也则有之若以妾为夫人则固无其礼也公卒立之国人始恶之繇是而观则春秋所载成风敬嬴者必其子君鲁之後尊以为夫人而仲子者亦隐公让桓而为之尊其母耳若先公在日则固未尝以妾为夫人也齐仲孙所谓鲁秉周礼未可取也者以此

出奔而复者卫成公卫献公也成有俞之卿献有鱄及仪之亲焉出奔而不复者鲁昭公卫出公鲁哀公也昭公有一子家羈而不能用出公愎而虐哀公妄君子以为蔑推之蔑挽之矣

春秋质疑卷十二